

Morning Regional Dogri News Bulletin, 01st June 2025

मार्निंग डोगरी न्यूज़ बुलेटिन, समें. 09-20 Hrs

Headlines

- केन्द्रीय राज्य मंत्री डॉ. जितेन्द्र सिंह होर अज्ज डोडा जिले दे भद्रवाह कस्बे च 2 दिन दे त्रीये लैवेंडर उत्सव दी शुरूआत करगंन।
- उपमुख्यमंत्री होरें नौशेहरा दा व्यापक दौरा लाया ते लोकें दिएं समस्याएं गी सुनेआ ते उंदा नबेड़ा कीता।
- सेना प्रमुख होर बीएसएफ महिला गी सम्मानत कीता। उनें आपरेशन सिंदूर दरान साबका फौजिएं दी भूमका दी बी सिफ्त कीती।
- आपरेशन शील्ड तैहत जम्मू कश्मीर च सफलतापूर्ण नागरिक सुरक्षा सरबंधी मॉक ड्रिल दा सरिस्ता कीता गेआ। एहदा मकसद लोकें गी आपातकाल लेई बेहतर ढंगै सिर तैआर करना ऐ।
- स्कूली शिक्षा निदेशालय जम्मू आस्सेआ जम्मू खित्ते दे सम्मर जोन हेठ औंदे सारे स्कूलें लेई छुट्टिएं दी घोषणा कीती गई ऐ।

<><><><><><>

Lavander Festival

वैज्ञानिक औद्योगिक अनुसंधान परिषद सीएसआईआर भारतीय एकीकृत मैडिसिन संस्थान आईआईआईएम जम्मू अज्जै थमां डोडा जिले दे सरकारी डिग्री कालेज भद्रवाह च त्रीये लैवेंडर उत्सव दा सरिस्ता करा करदा ऐ। दऊं दिने आले इस उत्सव दा उद्घाटन प्रधानमंत्री हुंदे दफ्तरै च राज्यमंत्री ते सीएसआईआर दे उपाध्यक्ष डॉ. जितेन्द्र सिंह होर करगंन। इस उत्सव च एग्री स्टार्टअप मेले दा बी आयोजन कीता जाग जेहदे च लैवेंडर कन्नै सरबंधत उत्पादें ते प्रौद्योगिकिएं च नवाचारें गी दस्सेआ दसाया जाग

<><><><><><>

Dy CM Noushera

उपमुख्यमंत्री सुरिन्दर चौधरी होरें नौशेहरा दा व्यापक दौरा लाया ते लोकें दे प्रतिनिधिमंडल कन्नै मलाटी लाइयै नेके मामलें जियां शिड़क राबता, पानी, बिजली, सेहत ते विकास बारे उंदी समस्याएं ते मंग गी सुनेआ। उनें बन्ने आले इलाकें च रवा'रदे लोकें दे कल्याण लेई सरकार दी वचनबद्धता गी पक्का कीता। उनें जोर

देइयै आखेआ जे लोकें गी बुनियादी सहूलतां उंदे घरे कश उपलब्ध करोआना सरकार दी पैहली तरजीह ऐ। उपमुख्यमंत्री होरें समस्याएं दे नबेड़े लेई सरबंधत अधिकारिएं गी मौके पर गै हिदायत जारी कीतियां। श्री चौधरी होरें हर कुसै थाहर दे पूरे पराते ते सामे विकास, लोकें दी जीवन सतह गी बेहतर करने ते बन्ने आले इलाकें दे लोकें गी दरपेश चुनौतिएं दा हल्ल करने लेई सरकार दी वचनबद्धता गी फही जाहर कीता।

<><><><><><><>

COAS Akhnoor

सेना अध्यक्ष जनरल उपेन्द्र द्विवेदी होर जम्मू कश्मीर दे परगवाल सेक्टर च अभियानें सरबंधी तैआरिएं दी कल समीक्षा कीती ते टाइगर डिवीजन दा दौरा लाने सनें आपरेशन सिंदूर दरान फौजिएं दे बेजोड़ प्रदर्शन दी सिफ्त कीती। दौरे दरान श्री द्विवेदी होरें मजूदा हालात च सौहगा रौहने दी जरूरते पर जोर पाया। सेना अध्यक्ष होरें भारतीय सेना ते बीएसएफ दी तगड़ी सांझ दी बी तरीफ कीती ते अखनूर सेक्टर च अगेत्री चौकिएं दी राखी हिफाजत लेई असिस्टेंट कमांडेंट नेहा भंडारी ते उंदी टीम दी टकोह्दा तौरा पर सराहना कीती। श्री द्विवेदी होरें आपरेशन सिंदूर दरान थेआरबंद बलें दा समर्थन करने च साबका फौजिएं दे अनमुल्ले योगदान गी बी स्वीकार कीता।

<><><><><><><>

Viksit Krishi

विकसित कृषि संकल्प अभियान तैहत रामबन च बी करसानें दी जागरूकता लेई कार्यक्रमें दा सरिस्ता कीता। विकसित कृषि संकल्प राई—बाई सरबंधी मंत्रालय दा इक जतन ऐ। एह्दे राएं करसानें तगर पुज्ज बनाइयै उनेंगी राई—बाई दी नमीं तकनीकें बारे जानकार बनाया जा'रदा ऐ। सना, संनासर ते चिल्ला पंचैत च आयोजन कार्यक्रमें दरान मकामी लोकें ते करसानें दी खासी शमूलियत दिखने गी लब्धी। इस दरान करसानें गी सांईसी तौर तरीके ते सरकार दी मदद कन्नै चलाई जा'रदी स्कीमें बारे जानकारी दित्ती जा'रदी ऐ।

<><><><><><><>

Lok Adalat

जम्मू कश्मीर कनूनी सेवा प्राचीकरण आस्सेआ शनिवारें दूई राष्ट्रीय लोक अदालत दा सरिस्ता कीता गेआ। एहदा मकसद बक्ख-बक्ख चाल्ली दे मामलें दा आपसी सलाह मश्वरे कन्नै नबेड़ा करना हा। आकाशवाणी जम्मू संवाददाता दी रिपोर्ट मूजब प्रदेश दे 20 जिलें च कामयाबी कन्नै इनें लोक अदालतें दा आयोजन कीता गेआ। 173 बैचे आससेआ इक लक्ख 82 ज्हार 786 मामले हत्थें च लैते गे, जिंदे चा इक लक्ख 36 ज्हार 20 दा नबेड़ा कीता गेआ। इस दरान 60 करोड़ 25 लक्ख 29 ज्हार 772 रपे दी रकम मुआवजे दा फही यकमुश्त रकम दे तौरा पर बक्ख-बक्ख मामलें च दित्ती गई। केन्द्र शासत प्रदेश लोक अदालत दा सरिस्ता जम्मू ते कश्मीर ते लद्दाख हाई कोर्ट दे मुख्ख प्यायधीश न्यायमूर्ति अरूण पल्ली हुंदी अगुवाई च होआ।

<><><><><><>

Mock Drill

आपरेशन शील्ड दे इक हिस्से दे तौरा पर संवेदनशील सरहदी इलाकें सनें जम्मू कश्मीर च कुल नागरिकें मॉक ड्रिल दा सरिस्ता कीता गेआ। आकाशवाणी दे जम्मू संवाददाता नै दस्सेआ जे संजा 5 बजे थमां रंभ होए दे इस बड़डे पैमाने आले अभ्यास च ब्हाई हमलें, ड्रोन सरबंधत खतरे, इंदे थमां बचाह ते ब्लैक आउट प्रोटोकॉल जनेह् अमरजेंसी हालात दा आयास कीता गेआं लोकें रातीं 8 बजे शा लेइयै साढ़े 8 बजे तगर इस रिहर्सल च शामिल होए। मकामी अफसरें दे तालमेल कन्नै आयोजित इस अभ्यास दा मकसद बन्ने पारा थमां कीती जाने आली कुसै चाल्ली दी बी माड़ी हरकत पर फही आतंकी खतरे कन्नै निबड़ने ते आम लोकें गी जागरूक करना हा।

<><><><><><>

Summer Vacation

स्कूली शिक्षा निदेशालय जम्मू आस्सेआ जम्मू खित्ते दे गर्मिएं आले जोन च पौने आले सारे सरकारी ते निजी स्कूलें लेई गर्मिएं दी छुट्टिएं दी घोशणा करी दित्ती ऐ। स्कूले 7 जून थमां 16 जुलाई 2025 तगर बंद रौहगंन। छुट्टिएं च अध्यापक ऑनलाइन परामर्श विद्यार्थिएं गी लोड़ मूजब देई सकदे न। नियम दी खलाफवर्जी करने आले खलाफ सख्त कारवाई कीती जाई सकदी ऐ।

<><><><><><>

Kheer Bhawani Yatra

इस ब'रे आली माता क्षीर भवानी यात्रा गी उधमपुर दे तैहसीलदार जय सिंह होरें अज्ज डीसी दफ्तरे थमां भक्ते दे जयकारें बश्कार सैली झंडी दस्सियै रवाना कीता। 18 यात्रुए दे इक जत्थे नै कश्मीर घाटी च गांदरबल जिले दे तुलमुला च माता क्षीर भवानी दे ऐतिहासक मंदर लेई अपनी यात्रा रंभ कीती। कश्मीरी पंडित समुदाय कन्नै टकोह्दे तौरा पर जुड़ी दी एह यात्रा धार्मिक महत्व रखदी ऐ।

<><><><><><>

IPL

आईपीएल क्रिकेट दे दूए क्वालीफायर च अज्ज अहमदाबाद च 5 बारी दी चैंपियन मुंबई इंडियन्स दा सामना पंजाब किंग्स कन्नै होग। एह मैच संला साढ़े 7 बजे शुरू होग। मैच दी जैतू टीम मंगलवार गी अहमदाबाद च गै होने आले फइनल च रॉयल चैलेंजर्स बैंगलुरु कन्नै मकाबला करोग। मुंबई इंडियन्स नै हुन तगर 5 खिताब जित्ते दे न जदके पंजाब नै इक बारी बी खिताब नेई जित्ते दा ऐ।

<><><><><><>